



Manmohan Singh-i Assam
nunger ayongzüker

25m rapid fire final nung
Vijayveer Sindhu-i silver angu



VOL. XVIII NO. 162 (ADOK 162) DIMAPUR

KÜPTOKNÜ (SATURDAY)

METSÜREMI (MARCH) 27, 2021

₹ 5.00

COVID-19 Nagaland: Nisung 4 anepaludar

Kohima, March 26 (TYO): Hokolbarnü Nagaland nung nisung ka dak COVID-19 aliba putetogo aser tang nisung 4 anepaludar.

"Tanü Dimapur nung nisung ka dak COVID-19 putet" ta Health & Family Welfare Minister, S Pangnyu Phom-i ashi.

Nisung 12,229 rongnungi 11,979 taneptsü nguogo aser Nagaland nung taneptsü angubaji 97.95% lir. Tang nisung pungu anepaludar, ta paisa ashi.

"Brihostibarnü Dimapur nung nisung ka asüba sülen bushisüngdang asüidang negative putetogo. Anungji Nagaland nung COVID-19 puteta alir nisung 91 süogo saka parnok 10 bo tanga timtem ajanga asü," ta State Nodal Office Dr Nyanthung Kikon-i metetdaksü.

Iba nisung ya Dimapur-i anir aru aser bushisüngdanga aodang pa ya lendong ka nung densema aliba bushitet. Iba jagi pa COVID-19 positive nungi agienogo, ta paisa ashi.

Nisung 154 tashi tanga state temi ogo ta Health & Family

Welfare Director, Dr Denis Hangsing-ia ashi.

Tang anepalurtemji Dimapur nung nisung 4 aser Kohima nung ka lir. Parnok ajak dak shirangba yimya kecha mali, ta paisa ashi.

Nagaland nung COVID-19 alitsü akok ta temolung melemi bilemba sample 1,35,648 tendangogo. RT-PCR ajanga sample 75,325, TrueNat ajanga 37,513 aser Rapid Antigen Test ajanga 22,810 tendang, ta Dr Hangsing-isa ashi.

Brihostibar tashi nung Nagaland nung nisung 58,777 nem COVID-19 vaccines (covishield) agütsüogo, ta State Immunization Officer Dr Ritu Thurr-i metetdaksü.

Nagaland nung nisung 58,777 nem COVID-19 vaccine dose 80,321 agütsüogo. Parnokji frontline workers 35,962, healthcare workers 11,942, teintet rogo 8,546 aser arishi küm 45 ser temapur 2,188 lir, ta paisa ashi.

Healthcare workers 8,000 aser frontline workers 13,544-i Covid vaccine indang dose anaprong agiogo, ta Dr Thurr-isa metetdaksü.

NE nung Mar 29-Apr 2 tsüngda tzünglu kanga arutsü

Guwahati, March 26 (Agencies): March 29 nungi April 2 tashi Northeast India kübok tesem kar nung tsüngpret yaa aser tsüngmok atena tzünglu kanga arutsü ta India Meteorological Department (IMD)-i metetdaksüogo.

"Bay of Bengal nungi mopung aonba ajanga March 29 nungi April 2 tsüngda tzünglu kanga arutsü. Talisa March 30-31, 2021 anogotem tzünglu timba arutsü" ta IMD-i ashi.

IMD-i taruba anogo pungu atema asadangtetba osang metetdaksüba nung Northeast state tem nung March 25-27 tsüngda tzünglu terara alutsü aser March 28-29 nungi tzünglu kanga aruba tenzüksü ta shia lir.

March 26-27 tsüngda Assam, Arunachal Pradesh aser Meghalaya nung tzünglu arutsü.

Nagaland, Manipur, Mizoram aser Tripura state tem nunga tesem kar nung tzünglu arutsü ta parnokisa ashi.

March 29 nü Arunachal Pradesh, Assam, Meghalaya, Nagaland, Manipur, Mizoram aser Tripura nung tzünglu arutsü.

March 28 nü Nagaland, Manipur, Mizoram aser Tripura nung mopung 30-40 kmph aontsü, ta IMD-isa metetdaksü.

March 29 nunga Assam, Meghalaya, Nagaland, Manipur, Mizoram aser Tripura nung tzünglu aruba den mopung aontsü ta parnokisa ashi.

Jungjunga olemtepra Naga yimten latettsü: Neiphiu Rio

Kohima, March 26 (TYO): Olemtepertem tsüngda tebilemtsü onüktem kümdanga jembitepra Naga yimten latettsübaji takoktsü lir, ta Nagaland Chief Minister Neiphiu Rio-i ashi.

Kohima water supply project tenzüksüba sentong nung osangbener den jembidang CM Rio-i iba ya ashi.

Nagaland Assembly-i Naga yimten tebilemtsü atema onük pezü bangzüngtepba sülen pa den külemi Opposition Leader T R Zeliang aser tangartem Delhi nung oa Central lennirtem aser ketdangsürtem den ajurutepeggo ta Rio-isa metetdaksü.

"Onoki Union Home Minister Amit Shah den ajurutepe olemtep tajung kaogo. Ni Intelligence Bureau ketdangsürtem den ajurutepe aser onok külemi Delhi

nung NSCN(IM) lennirtem dena ajurutepeggo" ta paisa ashi.

"Olemtepertem tsüngda mepelatep mesüra ashishitep kar alitsü akok, saka asenoki kümdang olemtepra, yimten latettsü lenmang angütsü ta ni bilemer" ta CM Rio-isa metetdaksü.

Lamhainamdi nung nisung tepsetba aitsür:

Lamhainamdi tesem nung ali mangatettep atema nisung asem tepsetba aser garitem rongdoktsüba aitsür ta Chief Minister Rio-isa metetdaksü.

"Iba tatalokba atema sorkar kanga mepelar aser Home Minister-i anir civil society telok aikati iba lendong aitsüogo" ta paisa ashi.

Tarutsü nung iba ama lendong mataloktsü atema police mapa lemmzüksüogo aser parnoki

tensa aziüokdar. Tarutsü nung mangatettep kar danga adokra, timi angatetteptsüla, ta Rio-isa metetdaksü.

Iba tatalokba nung ajemdaker Western Sumi Hoho President-i mapa nungi anenba pelashishia agizüker. Lennirtemi iba amala tebilemtsü onüktem atema akangakanga mapa inyaktsüla, ta paisa ashi.

Iba tatalokba atema police-i SIT ka tentetogo aser parnoki mapa tenzükogo. Tapayutsü takümtem samaba atema sorkari süoki ia bilemer aser onoki iba ya ozüngi memelaba inyakyim ka ama züngshia mapa inyaktsü, ta Nagaland Chief Minister-isa osangbener dang ashi.

Iba lendong atalokdang IR personnel liasü ta osang kar prokshiba atema SIT-i bushisüngdangtsü, ta paisa ashi.

Kohima jila nung tzü tajungba angutsü

Kohima, March 26 (TYO): Hokolbarnü Nagaland Chief Minister Neiphiu Rio-i Kohima nung water supply mapa tajungba küma tenzüksüogo.

Southern Angami Region kübok Water Treatment Plant site, Mima village nung Zaru ayong nungi Kohima jilai tzü bener arur.

Kohima nung anogoshia tzü litre million 11 nüngdaker saka tang litre million 1.5 dang angur. Zaru project tenzüksüba ajanga Kohima nung tzü agi anüngba khuret ajema akümtsü kechiyong iba ajanga anogoshia tzü litre lakh 3.8 agütsütsü.

Iba mapatong ya 2012 küm tenzüksü aser Rs. 46.73 crore endoka yangluogo. Iba mapa ya Ministry of Housing and Urban Affairs (MoHUA)-i 90:10 (Lump

sum) tangatetba nung senotsü agüja inyak.

Iba scheme ajanga PR Hill, Chandmari, PWD aser main town nung shilem ka dena consumers 3000 nem tzü agütsütsü.

"Iba maparen indang distribution system tajungba akümba sülen ano ward talila nem tzü agütsütettsü" ta Chief Engineer aser Head of Department, Public Health Engineering (PHE) Nagaland, Repangyangba Longkumer-i ashi.

Iba mapatong ya power supply nung ajemdaker yanglu aser iba jagi back-up generators amshitsü lenmang bushitepdar. Zaru ayong nungi tzü atsüba sülen Kigwema village nung reservoir ka nung bendenba

sülen ang Kohima-i tzüji tongji bener arur. Iba mapatong indang design capacity ji anogoshia litre million 3.80 lir, ta Repangyangba Longkumer-isa metetdaksü.

Taküm nung tzü ya kanga tongtipang lir aser kanga dang senti kümogo. Yimtsüng ana aser PHE department den power department tem amalitepa mapa inyaktsüla, ta Chief Minister Rio-i ashi.

Kohima nung nisung talila akümba ajanga tajemtsü tzü agi meperir. Tzünglu marudang ayong nung tzü akongba ajanga nisungtemi nija tzü bena ayokertem dang nungi alia ajemer, Ajisüaka, iba ama tzü ya jungjunga anepalu masü aser iba jagi tashidak balala menatsü akok, ta paisa metetdaksü.

(Maneni tapak 9 nung...)

ZSUD-i shimo milen tsükloker asür nem tetushi agütsü



Lamhainamdi yimtsüng nung tepsetba nisung asem nem tetushi agüja March 26, 2021 nikongdang Zeliang Students Union Dimapur-i Super Market nung shimo milen tsükloker sentong ka agiba angur. (Dimapur, March 26)

Dimapur, March 26 (TYO): Peren aser Dimapur district tem arrtsü anasa aliba Lamhainamdi yimtsüng nung March 22 nikongdang nisung asem tepsetba atema tetushi agüja

Zeliang Students Union Dimapur-i Super market nung shimo milen tsükloker sentong ka agiogo.

Iba sentong nung nisung noklang aika adenshir asürtem-

Itingwangbe Haikam, Hangyi aser Asiambo nunger nem tetushi agütsü.

Sentong nung telok balala nungi lennirtemi nisung asem tepsetba aitsü aser ozüng

amertem o state sorkar dang iba ken o jungjunga bushisüngdangtsü mepishi.

Nisung tepsetertem aputsü aser ozüng tapet agi merenshitsü atema parnokisa takhangba

agütsü aser ibaji meinyakjra, state sorkari iba tebilemtsü khuret abentsü ta lennirtemisa metetdaksü.

"Naga nunger tsüngda nisung tepsetepba anentsüla. Meimchirtem ajak kasa dang lir. Zeliang nunger ya yimjung meimertem aser onoki kin o kin telemsa ayuba magizüker," ta Zeliang People's Organisation Dimapur lennir kati ashi.

"Asenok kati ka tepsettepa ya manenra, Naga nunger atea tarutsü malitsü. Asen lima nung yimjung aginüra, temeten agütsütsüla. Asenok ajak longjemer Zeliang nunger atema dang masü saka Naga nunger ajak atema temeten bushidi" ta paisa ayongzüksü.

State kübok tesem balala nung kitsük-kirong lendong atalok



West Dimapur nung Fire Personneltemi Gari ka nung mi adoka aliba remseptsü merangba mapang tangokba noksa ka yangi angur.

Dimapur, Metsüremi/March 26 (TYO): State Stadium, Dimapur nung mi lendong adoka lir ta March 25, 2021 nikongdang 4:59 ako nung osang aruba sülen Fire Station Dimapur (West) nungi Fire & Emergency Services team ka Duty Commander SI M. Martin Miasalhou-i anir oa liasü.

Iba lendong nung gari ka rongdok aser sen lakh 6 shi jenjang oset rongdoka liasü. Mapang shidak nung mibener tem arua iba mi remseptet aser sen lakh 1 jenjang osettsüset iba lendong nungi kumzüük. Gari nung wire short circuit nungi mi ya adok südi, ta temolung melemi lir.

Fire Station Chümoukedima, Dimapur anasa National Institute of Technology nung aliba arem nung morok mi jangrua lir, ta March 25, 2021 nikongdang 1:40 ako nung osang aruba sülen iba mi remseptsü asoshi Fire Station Chümoukedima nungi Fire & Emergency Service team nungi

Duty Commander SI Meyiehusul Neikha-i anir hadir tabensa den Fire Personnel tem oa liasü.

Mapang shidak nung osang agüja, mibener temi hadir tabensa bener aoba ajanga iba mi ya azüoktet aser danga leni prokshia aotsü aliba nokdanga liasü. Iba mi remseptsü asoshi parnoki ghonda ka agia liasü. Iba mi lendong adokba ya ano mejangjateti lir, aser iba mi lendong nung nisung asü-ama meliasü.

Assembly Secretariat Main Gate anasa Thizama Road nung morok mi adoka lir, ta March 25, 2021 nikongdang 4:04 ako nung osang aruba sülen Fire Station Kohima (North) nungi Fire & Emergency Services team ka oa liasü.

Iba lendong nung sen lakh 10 shi jenjang ki-o-jen rongdoktsü liasü, saka mapang shidak nung osang agüja Fire Personnel temi telangzüba agütsüba ajanga mi ya remseptet. Iba mi remseptsü asoshi parnoki mapang minute

20 agia liasü. Tang tashi iba mi tenzüka kuli monguteti lir aser Fire team ya Duty Commander SI Inaka lenisüba kübok oa liasü.

March 25, 2021 nü Peren district kübok tesem pezü nung morok mi adoka liasü. Mezüngbuba nung district Court, New Peren temeket nung mi jangrua lir, ta nikongdang 1:30 ako meta osang aru. Kasa nikongdang sa Deputy Commissioner aliba ki anasa nikongdang 4:50 ako meta, SP aliba ki anasa nikongdang 6:00 ako nung aser tesüsa New Peren Village Council Hall anasa nikongdang 7:00 meta mi adoka lir ta osang arua liasü.

Hadir tabensa bener mibener tem yokba ajanga mi ya temeket tesemi kaoloka aotsü aliba nungi kumzüika liasü.

Maneni Pellhang, Peren nung morok mi aoba osang ka March 25, 2021 nikongdang 4:05 ako nung sangoktsüba sülen Fire Station Jalukie nungi Fire & Emergency Services team ka Duty Commander ASI Neikielie Keyienchu-i anir oa liasü.

Iba mapang sen lakh 4.5 jenjang süngjang-lijang aser ki-o-jen rongdoka liasü. Mapang shidak nung osang agüja mera agiba ajanga temeket tesemtem nung kaoloka aotsü aliba nungi kumzüktet. Iba mapang sen lakh 7 shi jenjang rongdoktsü liasü. Fire Team-i minute 43 agia iba mi ya remseptet, ta ashir. Iba mi lendong tenzüka kuli tejangja tang tashi monguteti lir.

Lamhainamdi lendong atema state sorkari kecha meinyaker: NPCC

Dimapur, March 26 (TYO): March 22, 2021 nü Lamhainamdi nung tai maketba nisung asem tepsetba sülen nungi repranga arunung state sorkari mapa kecha meinyaketer, ta NPCC-i sangdong ka nung metetdaksüogo.

Onoki iba inyakyim khukhua aitsür aser iba ajanga Khristan loktiliba tenüng menütsüogo. Nisung tepsetertemji Khristantem süra, Tsüngrem tsüngdang takok meshitsüla aser lokti nem metetdakja ozüing amer ket nung bendanga agütsütsüla, ta NPCC President K Therie-i ashi.

Tasür kibongtem aser medemertem den onoki mangyimba jashi lemsateper aser asürtem tanüla teti anisüngzüük ngudakjangma, ta paisa ashi.

"Iba ya ajungben lendong ka masü saka bilemdanger inyakba ka lir. Sorkari iba ken o jungjunga meteta lir saka parnoki zübazüba toktsüogo aser telemetba shitak magiteter. Nübertemi state sorkar joko akhüm metsübur. Lendong ataloker anogo pezü süika nisung shinga pua marutetba ajanga sorkar tebilemba sayur" ta K Therie-isa metetdaksü.

ANCSU-i Senior's Conclave ayongzüksü

Dimapur, Metsüremi/March 26 (TYO): All Nagaland College Students' Union (ANCSU) ajanga March 29, 2021 nikongdang 2:00 ako nungi tenzüka "Seniors' Conclave" sentong ka Tourist

Lodge, Dimapur indang Conference Hall nung ayongzüka agitsü.

Iba sentong nung adentsü asoshi ANCSU seniors ajunga pelashishia jaoker, ta sangdong ka ajanga ashi.

45 buba AKTD lokti mungdang March 29 nung alitsü

Dimapur, Metsüremi/March 26 (TYO): 45 buba Ao Kaketshir Telongjem Dimapur (AKTD) Lokti Mungdang aser 14 buba Excellency Award sentong ya March 29, 2021 anepdang 11:00 ako nungi tenzüka Saku's Mission College (SMC) indang Auditorium Hall, PWD, Dimapur nung agitsü renema lir. Iba mungdang ya "Terajem Takum" omen nung ajemdaker amungtsü.

Iba sentong nung 2019 aser 2020 küm HSLC aser HSSLC

tatidang nung AKTD züngsem nungi temaba jenjang ngutetertem nem senpet agütsütsü.

Iba sentong nung AKTD kübok yimtsüng unit aser sub-unit shia nungi nisung pongu arua adentsü, mungdang timsür Naga United Kaketshir Telongjem Dimapur aser Aoyimkum Kaketshir Telongjem Dimapur alitsü.

AKTD nung taoba mapang tenzüka alir ajak iba mungdang nung adentsü pelashishia jaoker, ta sangdong ka ajanga ashi.

ABAM Social concern sensitization sentong agi



Dimapur, Metsüremi/March 26 (TYO): ABAM Social concern sensitization sentong maneni Nokpu Baptist Arogo nung March 26, 2021 anogo takok ngua agiogo. Ajak agi Arogo nung Ministry balala nung tenzükertem aser Yimsusurtem Village Council chairman-i Anir nisung 25 shi arua aden. Tanü lokti tebilemtsütem Yimten aser

Arogo külemi inyak nung takok lir ta sensaksema lokti anaprongla teka amteper inyaksü akang akanga jembu.

Tsüngremi Nokpu Arogo aser Yimten külemi teka amteper inyak dang takok agüjangta ABAM sarasadem ayur.

ABAM-i Nokpu arogo iba sentong achaayangba asoshi pelaba metetdaksür.

Nagaland Chief Secretary-i Zunheboto semdang

Dimapur, Metsüremi/March 26 (TYO): Chief Secretary, Government of Nagaland, J.Alam, IAS ajanga March 26, 2021 nü Zunheboto district semdanga liasü. Pa meina Commissioner, Nagaland, Rovilatuo Mor, IAS ao aser parnoki Deputy Commissioner, Zunheboto aliba kidang administrative officer, Sumi Hoho tir aser külem tenzükertem den sensaksem kaa liasü.

J. Alam-i Zunheboto semdangba ya district nung aliba kin tem tali tejangjaba metettsü nükjidong nung lir, ta

ashi aser Nagaland nung aliba tribal hoho ajunga den tesendaktep tajung aginer, kechiaser ken o aika kin balala indang tebuti tentet teyari nung bentet-ratettsü lir, ta pai ashi.

Paisa Zunheboto nungi Lumami ajanga Mokokchung aser Wokha district tem semdangtsü aser menua melie Nagaland nung aliba district ajunga semdangtsü, ta metetdaksü.

Sorkar aser kin balala hoho tem tangatetep tajung alitsü nüngdaker, kechiaser tensa balala arudang civil society teyari kanga nüngdaksü, ta

Chief Secretary-i ashi.

Tebilemtsü khuret ajakbo khen nungi mokoktettsü, saka civil society teyari nung khuret tesashi aika pongdoktettsü, ta pai ashi.

Sumi kin tenüng nung Sumi Hoho tir Hekhushe Sikhu-i jembiba mapang, nübur ajungtsü mechi sorkar den amalitep alitsü ya parnok indang nükjidong tongtipangba lir, ta shia liasü.

Iba senden nung Deputy Commissioner, Zunheboto, Peter Lichamo menden liasü, aser paisa senden nung district dak sendakba tebilemtsü khuret lemsatepa liasü.



Hokulbar nikongdang Discipleship Bible College, Mt. Miracle pur 40 buba Fresher's Day amungdang Minister, Higher & Technical Education & Tribal Affairs, Temjen Imna Along Longkumer-i kaketshirtem den jembiba mapang tangokba noksa ka angur. Maneni kasa sentong nung kaketshir tasenpur temi temeja ken ka atenba noksa nungsa angur.

TIPRA-i Tripura ADC election atema nübo ayimer



Tripura chuba jabaso aser Indigenous Progressive Regional Alliance (TIPRA) tanishir Pradyot Manikya Debbarman-i Sabroom nung lokti sentong ka nung adendang agiba noksa angur.

Agartala, March 26 (Agencies): Tripura chuba jabaso Pradyot Manikya Debbarman-i anir Indigenous Progressive Regional Alliance (TIPRA)-i Tripura Tribal Area Autonomous District Council (TTAADC) election atema kanga meranga nübo ayimer.

Bobdar aser Brihostibar anogotem TIPRA-i Sabroom aser Gandachera nung nüboyimba sentong aika ayonga agiogo.

TIPRA-i bike rally, door-to-door campaigns, processions

aser lokti sentong ayonga agiogo. Parnoki April 6 nü TTAADC elections nung takok angutsü meranger.

"Parnoki (tanga political party tem) ozüing alema inyaker aser tesempatep adokdaksür. Onoki tesempatep masü saka tepela lemsateper" ta Sabroom nung Pradyot Debbarman-i o jembidang ashi.

"TIPRA-i ajaki atema noktaker. Onoki tesempatep masü saka tepela prokshir" ta paisa ashi.

TIPRA-i menden 24 nung

tokteper aser parnok den yaritepba telok Indigenous People's Front of Tripura (INPT)-i menden 4 nung tokteper.

Pradyot-i Takarjala-Jampuijala constituency nungi tokteper.

TIPRA-i Tripura ADC election atema nübo ayimer

Tripura chuba jabaso aser Indigenous Progressive Regional Alliance (TIPRA) tanishir Pradyot Manikya Debbarman-i Sabroom nung lokti sentong ka nung adendang agiba noksa angur.

Assam nung 'land jihad' & 'love jihad' anema ozüngtem yanglutsü: Amit Shah

Guwahati, March 26 (Agencies): BJP-i Assam nung sorkar yimsü asütsü tashi maneni ngura 'land jihad' aser 'love jihad' anema ozüngtem yanglutsü ta Union Home Minister Amit Shah-i metetdaksü.

Kamrup district kübok Kamalpur nung election nüboyimba sentong ka nung "onoki land jihad aser love jihad anema ozüngtem yanglutsü. Iba ya tawa sayaba BJP manifesto nung shia lir" ta Amit Shah-i ashi.

'Love jihad' ta asüba ya Muslim tebur aser Hindu tetsürtem tsüngda tesentaktep ayuba dang ajar.

Amit Shah-i 'Land jihad' ta ajaba ya lisopur li atsünga

agiba lir. BJP sorkari lisopur nem land pattas talila agütsütsü ta parnoki ashir.

Congress-AIUDF-i aniba sorkar kati kodang ozüng alema aiterkem ket nungi Assam kümzüka meyetettsü, ta paisa ashi.

"Tesüiba küm 5 tsüngda BJP-i aniba sorkari ozüng alema arurtem anema mapa aika inyakogo. Onok nem ano küm pungu kua, onoki Assam nungi ozüng alema aruba khuret samatsütsü" ta Amit Shah-isa metetdaksü.

"Rahul Gandhi-i tourist ka ama Assam-i arur aser pai Badruddin Ajmal ya Assam indang maitsü ta shiogo. Srimanta Sankardev, Srimanta Madhabdev, Bhupen Hazarika

aser Ahom general Lachit Barphukan nunger ya Assam maitsü ta pai memetet" ta paisa ashi.

"Tanü linüki Assam sobaliba aser oshi atema nüma atanger. BJP-i aniba sorkari Bhupen Hazarika nem Bharat Ratna agütsüogo" ta Amit-isa shisem.

"BJP-i Assam nung lungkak aitba anendaksüogo, curfew mali kümdaksüogo aser telungpur mali kümdaksüogo. Onok nem ano küm pungu agüjang, onoki Assam nung tzümetsüng aser anentsüh mali kümdaksütsü. Tesüiba küm pungu tsüngda onoki state renlok daksütsü atema mapa aika inyaksüogo" ta paisa metetdaksü.



Nagaon district nung distribution centre ka nung election ketdangsürtemi Assam assembly election mezüngbuba shilem atema election osettem reprangdangba angur. March 27, 2021 anepdang 7:00 ako nungi aonung 7:00 ako tashi West Bengal election 2021 aser Assam election mezüngbuba shilem agütsü.

Myanmar senso asem Imphal nung arua lir

Imphal, March 26

(Agencies): Myanmar senso asem Manipur kübok Imphal nung temang anepalutsü arua lir. Parnok ya March 25 nü Tamu Town nung injang agi yiru.

Myanmar Army Tamu town-i aoba sülen public dak injang khaloktsü. Iba mapang nisung 8 yiru aser parnok kar jena arur Manipur kübok Moreh atong, ta osang

angazüker.

India-i aruba sülen parnok nem first aid agütsü.

February 1, 2021 nü mitkartemi sorkar atsüngdokba sülen nungi Myanmar nung nübortemi lungkak aiter.

Mitkartemi sorkar atsüngdokba sülen nisung 275 shi khasetogo ta Assistance Association for Political Prisoners (AAPP) ajanga metetdaksüogo.

Meghalaya nung GNLA indang prangpong-injang ngutet

Baghmara, March 26

(Agencies): March 25 nü Border Security Force (BSF)-Meghalaya Frontier-i South Garo Hills district kübok Chegnigre yimtsüng nung prangpong-injangtem ngutetogo.

Prangpong-injangtemji Garo National Liberation Army (GNLA)-i miima ayuba asütsü ta temolung melemi bilemer.

Osang tejangja ka aliba BSF aser 43rd battalion


nungi sepaitem Chegnigre yimtsüng nung mita ao.

Iba mapang US-made .32 mm caliber pistol ka, 7.62 mm rounds 50, aser Iron Magazines (AK SVD Airsoft Sniper Rifles) 4 ngutet.

Iba tesem nung sepaitemi maneni prangpong-injangtem bushidar ta Inspector General of BSF-Meghalaya Frontier, Hardeep Singh-i ashi.

Yashi anguba prangpong-injangtemji Rongra Police Station ket nung agütsüogo.

Manmohan Singh-i Assam nunger ayongzüker



Guwahati, March 26

(Agencies): Assam nung assembly election mezüngbuba shilem agütsü anogo ka lia taoba Prime Minister Manmohan Singh-i video ka nung shisakaa vote enoktsütsü ayongzüko.

Constitution aser democracy pusemba sorkar ka nem vote enokjang ta Manmohan-i Assam nunger ayongzüker.

Arishi küm 88 tain Manmohan ya 1991 nungi 2019 tashi Assam nungi Rajya Sabha MP liasü. Iba sülen pa Rajasthan nungi Lok Sabha MP aküim.

"Küm aika Assam yak ü ki tanabuba lia arur. Assam nungeri kü nem küm pungu tashi Finance Minister aser küm 10 tashi Prime Minister inyakdaksü. Tanü ni nenok rongnung ka ama jembir. Nenoki vote enoktsütsü mapang ka tonga aruogo, anungji shisakaa vote enokjangma" ta pai metetdaksü.

Paisa Assam nung taoba Chief Minister tem- Hiteshwar Saikia aser Tarun Gogoi na den tesentaktep tajung aliba indang jembi.

Assam nungeri küm aika telungpur khuret agi timtema aruogo aser Tarun Gogoi lenisüba kübok 2001-2016 tsüngda Assam-i yimjung aser tereelok atema lenmang tasen

lapok, ta Manmohan-isa ashi.

"Ajisüaka, tanü tensa tamajung ajurua lir. Loktiliba nung tamangba yimsü, sobaliba aser oshi telemsa adoka lir. Tetsübu aser shisabulu tensa ka ajurua lir. Sen noktangba aser GST (Goods and Services Tax) mejungi inyakba ajanga rongsenkettsüng tashimait kümdaksüogo" ta paisa ashi.

"Nisung lakh aika mapa teinyakdak mali kümogo, lanurtemi mapa bushiteper, LPG aser totzü nung jenjang atuba ajanga nübortem timtemer. Sensakertem sensakba aküimer aser COVID-19 ajanga timtem tuluba bentsür aruogo" ta Manmohan-isa metetdaksü.

"India constitution aser democracy pusemba sorkar ka nem vote enokjang. Senso shia atema bilemtsüba sorkar nem vote enokjang" ta paisa ayongzüker.

Dr Manmohan-isa Congress manifesto nung nangzüka aliba onük pungu indang nenshia metetdaksü.

Congress-i Citizenship Amendment Act (CAA) mapa küma meinyaktsü, lanur nem mapa agütsütsü, süngolu nung mapa inyakertem taa tutsütsüba, kibong shia nem electricity 200 units angati agütsütsü aser mapa meinyakba kinungtsü shia nem ita shia Rs 2,000 agütsütsü nangzüka lir.



TIR YIMYIM YIMOBILEM (EDITORIAL)

DIMAPUR KÜPTOKNÜ, METSÜREMI (MARCH) 27, 2021

Ochi agi azükba

Yakanü Serampore nung sayaba Dr.Wati Longchari züluba "Tensa den apet ainker ola" kakat indang shisalemsatepdang, taoba ABTM lenir, Wt.Bendanglai "ochi agi zükra kanga tashi asür saka ochimashi mapatem nem kokdaksüra Naga lima aiatai tia ajurutsü," ta ashiba o nungji asenok ajak atema tebilemdangtsü, tangazüksü aser teinyaksü keta lir. Atangji, kakat tenüng jagia asen lima shiranga aliba aneptsü asoshi ainker ola nüngdakba indang ashir aser asenok atema ainker olaji iba kakat ya asütsü. Tanü ama asen lima tashiyim aser sübokrem agi shirangdaksüba mapang ya, Tsüngrem tenzüker ainkertemji shi nung tashidak puteta aneptsür super specialist medical doctor-tem amai lir. Shirangba nisungi pa mesüra la temang mejungi alibajibo meteta lir, saka kechi tashidak agi shiranger aser kechi agi aneptsüar memetet, anungji medical doctor-i pa mesüra la dang tashidak indangji ashitsüla aser mozü tesashi süaka shitak agütsü tenzüksüla. Atangji, küm aika temang mejungi arunungji tashidakji cancer asütsüa akok, saka tashidak tulu asüba agi pa mesüra la dang meshii yutsüra aser painkiller dang chidakja anepalura, iba jagibo tamajungaang akümtsü. Ibaji mesüka tanü asen lima nung government office ajak nung ochimashi agi sünga lir saka ochimashi teinyak ta indangindanga ashir mali. Ochimashi onsara nungji, joko shingaia pei ita senbo hau ta mali bilemer aser 'side income' angulen melira ita sen mangu amato bilemer. Aji oda, yimsüsür, ketdangser aser taremsür ajunga side income, commission aser adjustment nung pei taküm aser kibong takar akümtsü merangba ajanga asenok den ochi mapet kümogo. Atangji,yimten aser loktiliba mapatem nung indangindanga melitetbajibo yutsür asenok arogotema dena ochi nung masü adjustment nung aoer. Asenoki government sentong nung terenlok mapatem inyaksüba sen adjust ser tenla ki yanglur aser sensakertem asoshi lemzüksüba sen adjust ser arogo sannüker ki asür aser arogo mapatem inyaker. Ashiko, rural aser urban nung sensakertem asoshi aruba senotsü aser teyaritem dena adjust ser arogo lenirtem nem temeim tenla amai agüja alitsüa akok. Aji oda, asenok dak aketba ochimashi tashidak ya onsara tejen aser tulu aküm nungji, cancer anepalur ama khenbo ku ajak tsüka timatemtsüsa, mozü tesashi achitsü nüngdaker. Iba mozüji "Ochi-therapy" asütsü. Iba ochi-therapy mozü yabo medical doctor-temi masü ainkertemi agütsütsü. Ajisüaka, tanü asenok asoshi timtem tulutibaji ochi agi dang anünger masü saka ainker ola agia anünger. Asen lima nung tajungshi aser tayongzükba o jembia sayutsüngirtembo aika lir saka ainker ola agi tamajunger aser ochimashirtem arüja sayutsüngiba mali kümogo. Aji oda, ochimashi aser sübokrem agi yimsü asüba putu nung, ainker ola agüja sashisashia arütsütsü melen tajungshi aser tayongzükba o agütsüba tashidakbo tulu saka mozübo tila ka, tashidak makoktsüsa, underdose, agütsüba amai lir. Iba jagi tashidak majunger. Atangji, ochimashir arüja ainker ola adoktsüba tashidak asütsüla. Ibayongji, Apijemtsü Shin 29:18 nung ashi ama, tanü asen lima nung ochimashir soter mali kümogo. Iba jagi, asenok asoshi tebilemtsü tulutibaji ochimashir agi sünga aliba ya masü saka ochimashir nokdang aser arütsür ainker agi anüngba tebilemtsü ya asütsü. Atangji , akhi putu nung ama ainkertemi arütsüyonga yimsüsür aser nübortemi mangatsüa akok saka Tsüngrem tenzükertem karibosa ainker ola adoktsüla. Wt.Bendanglai ashi ama, ochi agi kodang ochimashir dak zükdir kanga tashi asütsü aser tako chiteptsü saka takoji mechitep tashi shirang majungtsü. Ashiko, Yisui Samariatsürla dang to na nü kinungbo pongo lir ta shia ochi agi mazük nungbo temulung memeyipla. Aji oda, ochimashir, nübortem shilem nungi commission agir aser saru agi kibong mesür Farisi aser tezülurtem dang, nenok anemsü, ambangyim aser tamajung agi sünga lir, nenok aiatai ta Yisui arütsüba ama, tanü asen putu aser jakla yimya dak apet ainker ola adoka ochi agi ochimashirtem dak sashisashia mazük tashi asen lima nung ochi agi ayaba yawara alitsü aser ochi agi ayaba yawara ali tashi chiyongtsü, taneptsü aser shisaliok shitak manguba yawara alitsü.

OLEMSABANG

ABAM lemtetba shitak alitsü imlar

S. T. Yapang Lkr. Kohima

ABAM Executive Secretary ajanga meyongnem agütsüba shiti ka WhatsApp nung ngua 'yamala shiti mopunglushi (Social Media) nungbo mesangdong tajungba' ta bilemogo, saka jungjunga shisadanga arogo inyakyim miimshia inyaksü masüji nübur tilar tular ajaki sadakjema ngua inyakbajisa tajungba ta menur ang nibo apijem.

Ajaki ngua lemsatepba ya maongka ka ama agizüka iba shiti nung teratatsü aketba ka lemsatepnür. Iba shiti No.AB03A32/2019-20/87 Dated Impur the 9th April 2020 nung yamai zülur angu;

To

Molungkimong Baptist Arogo C/o Pastor
Molungyimsen Baptist Arogo C/o Pastor

Temeim tenzükertem,

ABAM nungi Khrista temeim Salem ! Nenoki züluba shitem nung ajemdaker ABAM Sanen Luden senden March 19, 2020 nung amendang lemtetba osang yamai metetdaksür:

"SLT/2020-07: Molungkimong shiti (dt. 19.11.19) aser Molungyimsen shiti (dt. 6.3..2020): Ao lima nung Arogo mezüngbuba tenzüka aser Jubilee amongtsü onük kobasa arogo anapronglai zülüogo, mapang peria agia lemsateper yamai lemtet.

(i) ABAM Temzüng (Revised 2016) aser ABAM Nükla 2030 (2016) jeli o nung zülua aliba ama Dec. 22, 1872 nung Molungkimong nung mezüngbuba Ao Arogo tenzüka aser tanga Ao Arogo ka danga metenzüki liasü. Iba tangatetba nung ABAM noktaka lir.

(ii) ABAM tenoktak aser telemtetba ama meliteter den ABAM-i kecha shilem magitsü. Iba dak alaka kasa ken-o den sentakba joko ABAM nung kecha benoka mejembitsü."

Kibuba nung tenzüker,

Rev. Dr. Mar Atsongchanger.
Executive Secretary
ABAM

Iba shiti nungi angatetba agi Molungkimong aser Molungyimsen tenaprongi ABAM dangi shiti kaka zülü, süra iba o ya Molungkimong dang asü Molungyimsen dangi langzür kecha mangateter, aser yamala o sashisashia zülutsüsa ya asenokia khen bilemdangdi; oda ashirashi asen lima tammang tia nung lia Molungkimong-i mezüng Tsüngrem nisung Dr. Clark nem süngkhüm lapoktsüba koda! Pari ya melapok asünunga iba Khristan yimsü asen Naga lima koba jenjang nung lila! Ano Molungyimsen-a yim tasen ka razüksü alima tensa mejungi aliba mapang akümbaji koda! Ashiko yim tasen ya küma mao nunga Khristar wadang Naga tenem nung takok ngua aotsü lenmang makala kar.

Iba shiti nung shia aliba arogo ya yim taseni bener ait aser aji arogo taküm tamang, mepetmesü kar ajanga August 19, 1894 nung khen loksa ta ABAM 1986 telemtetba nungji jangja zülua angur, "December 23. 1872 (iba mapang tashi Dec 23 ta amshia liasü) nung tenzüka arogoji amangbapur yim tasen akümdangji bener ait saka arogo taküm tamang, mepetmesü kar ajanga iba arogo August 19, 1894 nung khen loksa aser tenzüksü."

Iba shiti ya shitak asü masü Impur nung inyaker ka dang asüngdangtep nung shitak ta jangja yangi tebilemdangtsü kar angur. Shiti nung ashiba o ya Molungkimong dang ashir asünungbo tanaben lephsia zülur asütsü, kasa Executive Secretary-baisa meyongnem agütsür yokba shiti ka No.AB03A32/2015-16/112 Dated Impur the 8th Nov. 2016 nung "1986 ABAM küm tatem Mungdang nung iba onük ajak tempangogo aser tanü tashi ABAM iba telemtetba nung noktaka lir." ta jangja zülua lir (Nagalima nung mezüng Arogo tapak 47." Ya joko Molungkimong dangisa tanaben yoker asünunga parnoki kuli o (documents) tejangja kar ngutetba agi keno kar ashishir mesüra telemtetba kar metongshitaktsünüba alika asünunga tang shiti No.AB03A32/2019-20/87 Dated Impur the 9th April 2020 nung züluba ama o tera sashia zülutsüja tamangba yimsü tentet ka asoshibo tera mazü.

ABAM 1986 lemtetba nunga "Tangatetba agütsür" ta sür "Arogo otsü dak sentakba nungi adokba ken O case ama Mungdang mesüra kija arogo shingaia mejembitsü, nüngdakra zülua aliba kuli O (document) bushiteptsü akok." ta zülutsüa aliba ya kanga shisa kaa lemtettsüogo ta bilemer, anungji kuli tejangja dang sürbo bushiteptsü lenmang sadema lapoka alitsü imlar.

Ano ya Molungyimsen dang ashir asünunga tekalen ashiba ama shiti No.AB03A32/2015-16/112 Dated Impur the 8th Nov. 2016 nunga tang teinyakdak Executive Sectary-baisa "1986 ABAM küm tatem Mungdang nung iba onük ajak tempangogo aser tanü tashi ABAM iba telemtetba nung noktaka lir." ta jangja zülua aliba angur, aser tanü tashi Mungdangi iba lemtetshiba mangazük, kechiyong lokti Mungdang küm tatem lemtetba ka Sanen Ludeni lemtetshitsü makoktsü südi. Tangbo yamaji melenshia malitsü ta imlar, saka yamalaka melenshira yimden yimli nungbo Senso Mungdangi lemtetba ka Sanen Luden kijai melenshi nung yim aika nung lanuri atsüzüka tazükba achitsü akok. Saka arogoren nungbo kechiang mashi yutsür, aji agi tanela jenjang alur aser ali jenjang seret atur.

Asen Nagalimai Khrista yimsü bener temesüng nisung arur aoba ya küm dir (80) shika, ajia nisung ka kija masü nisung balala aika melentepa inyakba, asünungji parnoki züluba kulitem kenüyongi mebushimatsü, tamalen item kulitem reprangi asa America-i yokogo, saka tanü asen nisung dang masü asenoki sayuba pura yangji oa telidak lir, parnokia kuli tejangja ngutettsüa shingaia meteta mali, kuli tejangja anguba nungji kecha tai mali aser tebang o masü zülü o (documents) tejangja lira itemji metongshiteptsü mesüra angatetteptsü teti lenmang sadema lapoka alitsüji tim ta bilemer.

Kechi tamangba yimsü südir süang, kodang tamangba yimsü tentet kati yimden yimsüsüba menden ama sashisashia shilem agidir tesülen timtem adoktsü ana nung lir, yim tila talang nung oa alir asütsü akok mesüra yimti tulu anaprong tamangbaren nungbo jenjang kasa dang. Ano asenoki jungjunga shisadanga Khristanem asoshi pei kin tamangba telungjem tentet (tat. Aor asoshi ABAM) nung asen Arogoji züngsema alinung dang kotaki aotsü ta mali, ano Arogo tambu mesüra küm aika asüba agi kotaki temelaba aotsü taa masü. Arogo aser tamangba yimsü telok tentetba ya asen kotaki aotsü aser ano tangar danga iba lenmangji sayutsü asoshi dang südi, iba dak rangloker inyak nungbo keno tulua aika azüzükteptsü südi, saka züzüa yutsüra mesüra sashisashia langzür tapok tilaka para aika senzüka aotsü takoktsü lir.

2020 küm Molungkimong aser Molungyimsen tsüngda tobur mejungi zülutepba asenoki Tir Yimiyim nung nguogo, yamala tensa ka nung yimjung yanglutsüji ABAM dak teimla lir, saka tekalen shia aliba ama yasa zülü nungbo yimjung melen terata aser mangatetep dang tali adoktsü ana nung lir, iba ajanga ABAM akoksatsü, saka pei arogo sasep asoshibo takoksa kecha malitsü südi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Oshi ajak nung Laishiba adoktsü atema 'I Want to Know' campaign tenzük



Wycliffe Bible Translators' AIDS program Developer, Kathie Watters (abelen) aser translation team ka nungi züngsemtem tangokba noksa nung angur.

March 25, 2021: küm tashi nungbo oshi ajak nung Laishiba meyipzüka alima nung Laishiba agi anüngba wara anentsütsü nükjidong nung Bible translation agencies aika longjemogo; kechiyong tang tashi nung alima nung oshi tesadang shi nungbo Laishiba meyipzüka mali.

Easter mongpu atongtsü mapang anasa Bodhbarnü (March 24) Bible translation organizations teloktep-illumiNations-i "I Want to Know" campaign tenzük. Iba campaign nükjidong ya taruba küm terana (12) nungbosa alima nung jembiba oshi ajak nung Laishiba ajak mesüaka shilem terabosa meyipzüka adoktsü atema lir.

Alima nung tongtibang oshi 6,000 dak tema jembir ajisüaka iba nungjagi oshi 3,800 nungbo Laishiba meyipzüka mali.

Bible translation partners 10 ji- American Bible Society, Biblica, Deaf Bible Society, Lutheran Bible Translators, Seed Company, SIL International, United Bible Societies, Word for the World, Pioneer Bible Translators aser Wycliffe Bible Translators USA lir.

Interview ka nung jembidang Hobby Lobby nung ministry investment officer, Mart Green-i, partners-i longjemer inyaksü, kechiyong pei nija sasep nung inyakba dang nungibo longjemer timba inyaktettsü, ta ashi.

"Onok ministry partners rongnung kati danga Laishiba agi anüngba anendaktsütettsü, ta meshitettsü, ajisüaka ajak longjemerbo akoktsü, kechiyong team 9 den longjemer inyaksü," ta paisa metetdaksü.

Laishiba agi anüngba wara anendaktsütsü nükjidong nung illumiNations tentettsü atema 2010 küm Mart Green-i resource partners aser translation agencies ayongdena liasü.

"Onok akumli nung aliba mapang nung iba lima nung alir ajaki pei melungjang nung

Laishiba tekong karbosa koker alitsüji jangratemtsüka lir, kechiyong küm 2,000 jungaka iba ya ano matalok," ta pai metetdaksü.

"Kodang telok kati Tsüngrem O nüngdakdir ibaji kanga rongdak nüngdak ka lir, iba tetezü kechi südir süaka parnok süngjema melitettsü. Tsüngrem O bushitsü atema parnoki lenmang bushitsü. Laishiba meyipzüksü atema parnoki taküm-a bendanga agütsütsü. Iba nungji onoki-a shilem agia parnok yarisemner," ta pai metetdaksü.

Tanü-asüng technology tasen ajanga Tsüngremi lenmang lapoktsüogo; technology ajanga Laishiba meyipzükbba maparen nung yarıba dang masü saka YouVersion ama apps ajanga Laishiba nokdangba linüktem nung tetsükdaktsü agentsür, ta pai ashi.

"Laishiba meyipzükbba project putiotsü nung tang ama nükjidong tulu maliasü mesüra teams longjema maliasü. Tang Lai meyipzükertemi technology aser software amshia mapa kanga keraa inyakba ama kodanga meinyakdang. illumiNations ya oshi ajak nung Laishiba meyipzüksü atema tentetba telok lir; asalentong, nüburtem aser technology ajanga iba nükjidong ya atangji ataloktsü," ta pai ashi.

Green-i ashiba agi, tenyaba mapa tongtibang shilem rongnung iba ya-a ka asütsü, kechiyong Yisu Khrista tanaben alimai marudang linük ajak nung nütsüngsüba mapa inyakba maparen nung iba yagi yaritsü.

Tang tenzükba "I Want to Know" campaign ya Tsüngrem metetnertem atema lir; Pa tenzükner aser taküm nung nükjidong ataloknertem atema lir, ta pai ashi.

"Tsüngrem den tesendaktep tajung ayutsü atema mezüngbubaji Tsüngrem O metettsüla, aser nü ket nung Lasihiba melira ibaji sensak tia lir, anungji onoki ibaji (Laishiba

agi anüngba) samatsütsü meranger," ta pai ashi.

1998 küm Green-i Guatemala semdangba mapang nung nisung kati par oshi nung mezüng Laishiba angudang kanga pelaba lemsatepa liasü.

"Guatemala nunger nisung ka tenüng agi, Gasper-i Jakalte oshi nung mezüngbuba Laishiba angudang pai Laishiba nung tashie azüit aser tepela agi jepa liasü. Pai Laishiba azüitba ama nibo kodanga mazüitdang. Alima nung senti oset tajungtiba ka ama pai Laishiba azüit," ta Green-i ashi.

"Gasper ama alima nung nisung aikati pei oshi nung Laishiba mezüngdang. Alima nung nisung ajaki pei oshi nung Laishiba züngtettsü atema ni lenmang kabosa bushitsüla ta ni apiteta liasü," ta paisa metetdaksü.

Tang tashi alima nung nisung billion ka dak temaibo pei oshi nung Laishiba mangu, ta illumiNations-i metetdaksü.

Alima nung Laishiba rangben (Tejen aser Tasen lai naprongla) meyipzüka aliba oshi tasadang dak tema lir aser oshi 2,000 dak tema nungbo Laishiba tekong kata meyipzüka mali.

Tsüngrem O agi anüngba dang "Bible poverty" ta ajar, ta shia Green-i, iba ya sensak tia rongnung tamajungtiba lir, kechiyong ibaji ajanga tatem maka takoksa angutsü, ta ashi.

"Nisung kar sensak tia nung lir, ta süra parnok ket nung chiyungtsü mesüra tanga nüngdak balala mali, ajisüaka Tsüngrem O ya asen taküm atema chiyungtsü lir," ta Green-i ashi.

illumiNations nungi translators-i, 2033 küm tashi nungbo alima nung nütsüng shilem 95-i ei oshi nung Laishiba rangben angutsü, nütsüng shilem 99.96-i pei oshi nung Tasen Lai angutsü aser shilem 100-i Laishiba shilem karbosa angutsü atema onoki inyaksü, aser 2033 kümji Arogo atema kanga tongtibang küm ka asütsü, ta metetdaksü.

ANO GO ABEN TSÜNGREM DEN

Yisu melen teyarir ka

"Aji saka ni nenok dang adangji ashi, ni ao nung nenok asoshi tajungba; kechiaser ni mora Teyariji nenok dangi marutsü; saka ni ora ni pa nenok dangi yoktsü." (Yohan 16:7)

Yisu Khrista pa nütsüngtem toktsür ayipa anir aoba ajanga tamangertem rongnung temelenshi adokbaji Temshi Tanela den longjema alitsü angazük. Yisu-i pa melen teyarir ka yoktsü ta ashibaji Tanela Temeshi indang ashiba liasü. Temeshi Tanelaji asenok tesayur, tesüneptsür aser teyarir tulutiba lir. Adangji, Tenyartem mapang nung kodang Yisu Kotaki ayipa anir orr külen nütsüngtem longjema iba Tanela temeshi yongya liasü Kotak nungi Temeshi Tanela milak parnok rongnung amung aser tamanger shia Tanela milak agizük. Tanü Temeshi Tanela ajanga alima nung Tsüngremer sayatenya mapa jenti inyakba ya tesüngmangtsü ka lir, kechiaser, tsüngremi iba tashiji agütsü. Yisua ashi, "Kotak nung aser alima nung tashi-ain ajak kü nem agütsüogo" (Mat. 28:18).

Temeshi tanela shiba ajaklen alitsü akokba ain lir pa teti ajak nung asenok den dena lir. Iba yimli koda tulu. Yisu ayipa aoba ajanga asenok tanü iba maongka nung alir. Anungji asenok kong kechi tia ajurudir ajuruaka, Temeshi Tanela asenok teti yaritsü nangzüka lir. Asenoki pa den maneni longjema lidi.

Sarasadem

Kibuba Yisu melen nai onok dangi Temeshi Tanela onok yaritsü yok nung kanga pelar. Teti Temeshi Tanela den longjema lidi. Amen

Niger nung telungpurtemi

Khristantem densema nisung 137 tepset

March 26, 2021: Amongnü nıkongdang (March 21) Africa kübok Niger nung Islamic kiralongrartemi yim aika amakba mapang nung Khristantem densema nisung 130 dak tema tepsetogo, parnok rongnung tanur 20 dak tema densema lir.

Niger nung nütsüng shilem 90 bo Muslim nunger lir; Khristantem aikati tekülem sentong sadem-sadema agiteter, ajisüaka region kar nungbo Khristantem kanga reshikangshir.

Nigeria nung amenoka aliba Boko Haram kiralongrar teloki mapang shia southern Niger nung Khristantem nem timtem agütsür, ta Open Doors-i metetdaksü.

Niger kübok Mail arrtsülen mejangjaba nisungtem motorcycles nung aruba sülen yimtsüng asem amak, ta sorkar osang ka ajanga metetdaksü.

Mezüngbo yimtsüng asem amakdang nisung 60 shi asü ta asadangtet saka tesülen sorkari iba lendong nung nisung 137 süogo, ta metetdaksü.

Yim asem amakertemji shirnokar tejangjabo masü, ajisüaka West Africa kübok Sahel region nung Al Qaeda aser Islamic State den tesendaktep aliba kiralongrar telok aikati kanga timtem agüja arudar, ibayongji parnok dak melung malemer.

Amongnü Intazayene, Bakorat aser Wistane yimtsüngtem amakba mapang nung tanur arrshi küm 5 nungi 17 tsüngdapur nisung 22

densema 137 asü, ta United Nations International Children's Emergency Fund (UNICEF)-i metetdaksü.


UNICEF regional manager (West & Central Africa), Marie-Pierre Poirier-i sangdong ka ajanga, "Iba region nung tanurtem teti tetsübu nung alitsüsa akümbaji onoki mamangeter. Tanurtem nem security agütsütsüla. Maneni raraba aser amakba den security maliba ajanga onoki nüngdakbapurtem meyariteter; teyari nüngdakertem rongnung tanur million ana densema lir. Kibongtem aser tanurtem anema inyakba anentsüla," ta metetdaksü.

March 22 World Water Day jakdang yimdaklirtem tzu ataba mapang nung telungpurtem jagi parnok amak. Iba tatalokba sülen sorkari security agütsütsü aser aibelenertem pua temerenshi agütsütsü, ta metetdaksüogo.

UN-i alima nung terenlok jenjang asadangba linüktem rongnung Niger ya teküboktiba jenjang No. 189 nung ang lir.

March 15 nüa Tillabery region nung mejangjaba nisungtemi yimdaklir 58 tepset aser January ita nunga Tchombangou aser Zaroumbareye yimtsüng na nung nisung 100 shi tepseta liasü.

U.N. High Commissioner for Refugees-i ashiba agi, Niger kübok Tahoua aser Tillaberi regions nung Burkina Faso aser Mali arrtsülen refugees 204,000 shi lir.

OLONG PAITEP # 5765**TIPIEN**

1. Senzütsü lenmang tasak - 5
3. Tanüla - 5
5. Tzü meyok - 4
7. O jembiba yimya - 3
8. Inyaktet - 4
10. Ninang tesashi ka - 4
11. Maginü - 5
12. Aou agi yangluba tzu - 4
14. Benden - 4
17. Shilang - 3
18. Teloktep/külemi - 4
19. Tzü mali aküm - 5
20. Jenjang tulu - 5

LANGTSÜNGLEN


2. Tenarong majung - 5
3. Sen meshir agütsü - 4
4. _ _ _ _ _ Shiruru - 5
6. Ta-aksü mapa - 5
9. Mesük - 3
10. Mamatzü agütsüba shiruru ka - 5
13. Komo temaitsü - 5
15. Apitet - 5
16. Shiruru apütsü ayuba - 4

OLONG PAITEP # 5764 TELANGZÜBA**TIPIEN :**

1. Ila, 4. Taku, 6. Tera, 8. Temeli,
9. Adok, 11. Süngden, 13. Kima,
14. Sentsüwangshi, 16. Alet,
17. Anüdoklen, 18. Oli.

LANGTSÜNGLEN :

2. Atem, 3. Menden, 5. Kilen, 7. Aoksa,
10. Pakma, 11. Sempet, 12. Dawid,
15. Süngkong.

Noksa nung meputepi aliba 10 bushiang**TANÜBO NAI LANGZÜANG**

- Q. World Happiness Report 2021 nung India koba jenjang nung liasü?
A. 139 B. 144 C. 146 D. 136

===== (Taruba adok nung onoki langzütsü)

YASHI ADOK TELANGZÜBA : Uri: The Surgical Strike.

AO OSHI ANGAZÜKDAK:**TANÜ ANGAZÜKTSÜBA OJANG****Alen**

- (v) Teka agi tekong nung tango mesashitetsüsa sotba (strangle)
* Pai la dak tekong nung alen.

Alen

- (v) Nok tila agi tilala küma lepsa (cut into slices)
* Soruchiokertemi mersü tilala küma alen.



Tir Yimym

NAI-A YA METETTER MA?

Temang nung 'homeostasis' shitak alitsü asoshi tzu ya nungdakba shilem tongtibang ka lir. Süngjanglijang dang nungi Süngolemba nung tzu timba aliyongjia, süngjanglijang yagi temang nung teyari balala agütsür aser item ajak nung tzu dena lir. Tzü peria aliba süngjanglijang kar yamai alitsü :

- | | | |
|-----------------|---|-----------|
| 1: Watermelon | - | 91% water |
| 2: Strawberries | - | 91% water |
| 3: Grapefruit | - | 91% water |
| 4: Cantaloupe | - | 90% water |
| 5: Peaches | - | 89% water |
| 6: Asian Pear | - | 88% water |
| 7: Blackberries | - | 88% water |
| 8: Papaya | - | 88% water |
| 9: Nectarines | - | 88% water |
| 10: Plums | - | 87% water |
| 11: Oranges | - | 87% water |
| 12: Apricots | - | 86% water |
| 13: Pineapple | - | 86% water |
| 14: Raspberries | - | 86% water |
| 15: Apples | - | 86% water |
| 16: Blueberries | - | 84% water |
| 17: Mangos | - | 83% water |

SUDOKU # 5807

	1		6		8			
						4	6	1
	3	4			7			
				1				
		1	9	6			5	
	7						9	
9					1	3		
1				9		5		
				5	2	7		9

TELANGZÜBA # 5806

1	9	4	6	7	3	5	2	8
6	5	8	9	1	2	3	7	4
3	2	7	5	8	4	6	9	1
9	6	3	7	5	1	8	4	2
7	1	5	2	4	8	9	3	6
4	8	2	3	6	9	7	1	5
2	4	6	8	9	7	1	5	3
5	3	9	1	2	6	4	8	7
8	7	1	4	3	5	2	6	9

OJANG LUTEP # 5351

AAIEELBN	:							
KEIYNAR	:							
SSAAAETT	:							
AANLDIG	:							
NIBUNGO	:							
EZÜMNG	:							
GONIY	:							
ONZÜG	:							
NNGU	:							
KNAAANGID	:							

OJANG LUTEP TELANGZÜBA # 5350

KODANGA MATALOKDANGI ALIBA ATALOKDANG IBAJI
NGUA MEIMCHIR AJUNGA SÜNGMANGA AOKSATEPER

TAN HOPTA ATEMA - KOMA SÜLA ?

- Q. JCPI teloki akangba ama tangsa tang 1963 küm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zülüok tenzüc nunga koma süla ?

Olong 20 shi nung March 26, 2021 tashi nung iba telangzüba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzübatemji taruba Honibarnü adoktsütsü.



Patiala, March 26, 2021: Aluyimba ozüing tasen anema aluyimertemi ayongzükba 'Bharat Bandh' pusema Patiala nung Patiala Bar Association züngsemtemi shilem agia longkak aita jajaba noksa nung angur.

Aluyimertemi highways aser train lenmang mokdanga longkakait

Chandigarh, March 26 (Agencies): Centre sorkari benokba aluyimba ozüing tasen anema Hokolbarnü aluyimertemi linük tesem aika mokdangba anogo nung Punjab aser Haryana na nunga aluyimertemi tongtambang lenmang aika mokdang aser train lenmang-a mokdanga liasü.

Aluyimertem unions-i tentetba Samkyukta Kisan Morcha (SKM)-i, aluyimba ozüngtem anema Delhi artsülen- Singhu, Ghazipur aser Tikri nung aluyimertemi longkak ait tenzükba sülen ita pezü ajungba anogo nung aluyimertemi anepdang 6:00

ako nungi nikongdang 6:00 ako tashi Bharat Bandh ayongzüka agiogo, ta metetdaksü.

Aluyimertem pusema Punjab tesem aika nung shishilembaba tesemtem shibang aser Haryana nunga tesen kar nung shishilembaba tesemtem shibang. Punjab nungbo public aser nija gari khenyongi mesenzüdaksü.

Anepdang 6:00 ako matongdang state ana nungjagi aluyimertem highways nung adenshia lenmang mokdang- item rongnung Bathinda, Ludhiana, Amritsar, Patiala, Mohali, Rohtak, Ferozpur, Pathankot, Jhajjar, Jind, Panchkula, Kaithal,

Yamunanagar aser Bhiwani districts nung aliba highways densema lir.

Ajisüaka ambulances, rongdak garitem aser kiyimba sentong nung adener garitembo senzüdakja liasü, ta aluyimer lenirtemi metetdaksü.

Longkak aitertemi Amritsar, Jalandhar, Ludhiana, Ferozpur, Ambala, Jind, Jhajjar aser Panchkula densema district aika nung train lenmang mokdang train mesenzüdaksü.

Longkak aiter karibo Ambala Cantonment anasa Ambala-Delhi highway nokdangba agi nisung aikati timtem ajuruogo.

Tanü West Bengal nung assembly menden 30 atema election agitsü

Kolkata, March 26 (Agencies): Honibarnü West Bengal nung assembly election mezüingbuba shilem nung voters lakh 73-i vote agütsütsü; assembly menden 30 atema candidates ajak agi 191-i tokteptsü aser item constituencies ya timbaka taoba mapang Maoists telungpurtemi timtem agütsüba Jungle Mahal region kübok lir.

Election Commission-i Central sepai company 684 shi lemzüksüogo aser parnoki polling station 10,288 nung security agütsütsü, ta ketdangsertemi metetdaksü.

West Bengal assembly election mezüingbuba shilem nung TMC nungi candidate 29

asert BJP nungia candidate 29-i tokteptsü; Left-Congress-ISF teloktepiho menden 30 prongla nung tokteptsü aser menden kar nungbo teloktep nungi candidates aikati tokteptsü.

"Polling booths 1,307 aser premises 1010 ajakji Jhargram nung Left Wing Extremist (LWE) areas lir, ibayongji security atema Central sepai company 127 lemzüksütsü onoki lemtet," ta Election Commission nungi ketdangser kati metetdaksü.

Iba dak alia central sepai company 14 Quick Response Teams (QRTs) asütsü, company kati strong room anüksü aser company ana

district & sub-divisional striking force atema lemzüksü, ta ketdangserisa metetdaksü. Ajak senteper company 144 Jhargram atema lemzüksü, ta pai ashi.

Election mezüingbuba shilem nung state police ajak agi 22,092 lemzüksüogo.

Jungle Mahal ya tribal nütüing timba aliba tesemtem lir aser 2019 küm Lok Sabha electon nung iba region nung BJP-i constituency ponguprongla nung takok ngua liasü.

West Bengal nung shilem ti lemsar menden 294 atema election agitsü aser May 2 nü vote zünga election osang sangdongtsü.

MHA-i state tem dang benjung mapang Covid nokdangtsü tuyu

New Delhi, March 26 (Agencies): Tawa state aika nung coronavirus tashidak tali prokba nung ajemdaker Hokolbarnü ministry of home affairs (MHA)-i shidi ka ajanga states aser union territories ajak dang taruba benjungtem nung lokti adenshiba tesemtem nung wara nokdangtsü atema mera agia inyangang, ta tuyuogo.

Union home secretary Ajay Bhalla-i, states aser UTs ajak nung chief secretaries dang shidi ka ajanga benjung mapang nung wara prokba nokdangtsü atema mera agia inyaksü tuyuogo, ta metetdaksü.

Bhalla-isa, tang linük nung coronavirus tashidak putetba aser asüba timba kümdar, aser iba tensa asadanga sülen March 23 nüa MHA-i wara nokdangtsü atema telatetba kar metetdaksüogo, iba denji külemi states aser UTs dang tendangba, track asüba aser treatment agiba inyakim bensihiang ta tuyuogo, ta metetdaksü.

MHA-i sangdong ka ajanga, "Holi, Shab-e-Barat, alu aruhba

benjung balala aser Eid benjung densema benjung balala atongtsü mapang ana nung lia state/UT sorkartemi lokti aziöktsü atema mera agia inyaksüla; mask agidaksütsüla aser nisung tsüingda tetsüingda itta aliba inyakim benshidaksütsüla," ta metetdaksü.

"Mapa inyakba tesemtem aser lokti aliba tesemtem nung Covid-19 telatetbatem shidak benshidaksütsü atema State/UTs nem nenshia metetdaksür. Mask agidaksütsü, teka metsükdaksütsü aser nisung tsüingda pilaa lidaksütsü atema inyaktsla aser States/UTs sorkartemi senchi achiba densema tapet temerenshi agütsütsü atema inyaksü akok," ta MHA sangdong nung shia lir.

Tesüiba ghonda 24 tsüingda India nung ano nisung 59,118 dak coronavirus putetogo, aser taküm küm tenzükerbo anogo ka kija nung tang nisung timba dak iba tashidak puteter.

Tang iba tashidak agi teshirangdakupur lakh 4 dak tema kümogo aser iba tashidak agi nisung ajak agi 1,60,949 süogo.



March 26, 2021 nü Mumbai nung COVID-19 agi shirangertem yariba Sunrise Hospital anasa Dreams Mall nung mi lendong atalokba mapang sepaitemi mi enseptsü merangba noksa nung angur.

Puducherry election atema Sitharaman-i BJP Manifesto saya

Chennai, March 26 (Agencies): April 6 nü Puducherry nung assembly election agitsü lia Hokolbarnü Union Finance Minister, Nirmala Sitharaman-i BJP pur election manifesto sayatsüogo; manifesto nung lanurtem atema mapa 2,50,000 adokdaksütsü tenangzükba densema lir.

Puducherry nem "Special Union Territory" jenjang agütsütsü aser ibaji ajanga Jammu & Kashmir nung inyakba ama fund shilem 25 agüja aliba nungi shilem 40 kümtsütsü.

BJP-i Puducherry nung nisung 50,000 den asüingdangtepa party manifesto renem, ta metetdakja Union Minister-i, "Centre aser union territory naprongla nung BJP sorkar aliba ajanga Puducherry nung central schemes ajak benoka inyaktettsü. Taoba state sorkaribo ibaji meinyak, kechiyong tenüing tajung ajakji Centre aser Ato kilonser Narendra Modi nati agitsü, ta bilema item schemes meinyak," ta metetdaksü.

BJP-isa, tetsürtem nem tashi agütsütsü atema inyaksü, Kindergarten nungi Post-

Graduate level tashi nung tetsürtem nem shisaliok tajung agütsütsü aser college azünger tetsürtem nem scooters angati agütsütsü, ta nangzük.

Tetsür self-help groups nem sen loan lakh 5 tashi agütsütsü aser sen tetemlok (interest) magitsü, iba dak alia coronavirus wara nung ajemdaker Women SHG kari agiba loan sentsüh atoktsü, ta BJP-i nangzük.

Sorkar institutions aser local body election nung tetsürtem nem menden shilem 50 wazüka yutsütsü aser tetsürtem nem public transport angati agütsütsü, ta manifesto nung nangzükba lir.

Sangro zülur, Subramania Bharathy indang kürakyanglu ka yanglutsütsü, tourism centres tasen amenoktsütsü, IT Parks, Textile parks tasen yanglutsütsü aser Mammalapuram adena Chennai tashi railway sendakteptsütsü, ta parnoki nangzük.

Sorkar mapa atema Puducherry Public Service Commission tentettsütsü, kechiyong mapang talangka nungi nüburtemi iba takhangbaji agüja arudar, ta BJP-i metetdaksü.



March 26, 2021 nü Bangladesh yimtiba, Dhaka nung Bangladesh Ato kilonser, Sheikh Hasina-i tayimtsü anendak India Ato kilonser, Narendra Modi agizükba sülen tangokba noksa nung angur.

Israel election sülen sorkar tentettsü telok tejangja mali

Jerusalem, Metsüremi/March 26 (Agencies): Election osang tatem kati aruba sülen Israel nung ano maneni sorkar tentettsüsa takok angur tejangja mali lir, kong Ato Kilonser Benjamin Netanyahu aser pa den toktepertermi sorkar tentettsü asoshi nübu agi meperir.

Mongulbarnü agiba election ya Israel nung küm ana tsüngta parliamentary election pezübuba alitsü, aser ibai Netanyahu-i ochimashi mapa inyakba asoshi ken o benoka alidang pai maneni yimsü asütsü asoshi referendum ka agiba ama aikati züngshia liasü.

Pai nübuyimba mapang Israel nung kanga takok ngua COVID-19 mozü agütsüba maparen inyakba tiyong südaksü saka tashidak wara tenzükba mapang pai mera meshidaki agiba aser pa anema ken o benokaka ato kilonser mapa yutsütsü memolungba atema aija liasü.

Vote shilem 100 tashi azüngba nung menden 120 aliba Israel indang parliament,

Knesset nung Netanyahu'er right-wing Likud party aser par den sendaktepa alirtemi menden 52 ngutet, ta election commission ajanga Brehostibarnü ashi. Tangatetba balala agi sünger aliba party temi menden 57 ngutet, shirnoki pa atsüngdoktsü nükjidong nung kanga meranga inyaker.

Taoba mapang Netanyahu den külem asür Naftali Bennett-i aniba right-wing party ajanga menden tenet nung takok angu, Mansour Abbas-i anir aliba Arab Islamist party ajanga menden pezü nung takok angu. Telok anarpong yagi shir yaritsüar shia mali, kechiaser parliament nung telok aika lir, anungji tang tashi parnoki yaritsü bilema aliba memeteter.

Saka Religious Zionist Party tekolakba, Bezalel Smotrich-i, "Abbas teyari nung right-wing sorkar metentettsü," ta Brehostibarnü ashiba ajanga Israel Islamist aser Jewish party lungjemtsü asoshi teimla mesayur.

Netanyahu'er Likud party nungi atsüngzüka aosang

Gideon Saar, shiba Netanyahu atsüngdoktsü temolungtetba tulu nung menden trok bener aliba party tekolakba lir, pai "Netanyahu lenisüba kübok sorkar ka tentettsü asoshi nübu peria mali. Temelenshi asoshi sorkar ka tentettsü atema mera agitsü mapang tongogo," ta shia liasü.

Iba ama bloc ya democratic yimya anema lir, ta Likud party ajanga aitsü. Parnoki Netanyahu den tokteper ya Israel tsükchir tamajung, Iran nung tamangba yimsü tsütsü lenirtem den medemdang.

Netanyahu anema ashikülak mapa inyakba, sorkar temolung melemettsüsa inyaksangshiba aser asemen süpokrem agiba ken o benoka lir, saka pai aibelen mapa kecha inyaka mali, ta nokdaker.

Pa anema ken o benoka liaka, Netanyahu'er Likud party-i vote pezüsü kuma sadanger shilem ka nguteta parliament nung party tulutiba kumdaksü.

Knesset nung amentsü asoshi party 13 nungi lenirtem shimteta lir.



Bangladesh nüjiso ngur küm 50 ajungba anogomung nung Ato Kilonser Narendra Modi-i Dhaka semdangba mapang 14 Party Alliance nungi yimten yimsüsürtem ajuruba sülen tangokba noksa ka yangi angur.

Egypt nung train ana tsüktep, nisung 32 asü



Cairo, Metsüremi/March 26 (Agencies): Hokulbarnü central Egypt nung train ana tsüktepba lendong nung nisung tajemba agi 32 asü aser 91 yiru, ta health ministry sangdong ka ajanga ashi.

Mejangjaba nisungi emergency brakes nung kongshia train ka anendaksü, ta rail ketdangsürtemi ashi. Tanabuba train, koba kasa lenmang nung jaja liasü, iba train ya mezüngbuba train nung tesülen nungi arua atsük, ta ashi.

Noksa tem nunga train carriage tem parnok jajaba lenmang nungi alema orr, aser karbo kanga mejungi raksar ayong anasa nungtena nguogo.

Cairo nungi south tsütsü kilometer 365 shi pilar Nile ayong anasa Tahta jila anasa iba lendong atalokba bushisüngdangtsü totuyuba agütsüogo, ta public prosecutor indang ajanga ashi.

Egypt Tir Abdel Fattah al-

Sisi-i pa indang social media account nung iba lendong atalokba nung asürtem asoshi mangyimba lemsatep aser iba lendong atalokdaksür nem tapet temerenshi agütsütsü, ta ashi.

Sisi-i Ato Kilonser Mostafa Madbouly dang health aser social solidarity minister tem anir lendong atalokba tesemi aotsü ashi.

Iba lendong nung nisung 32 asü aser ambulance ter dak tema nung yiru-yipongertem anir anasa aliba mozükitem bushir, ta health ministry ajanga ashi. Iba lendong nung nisung 91 yiru, ta health ministry odongtari ashi.

Iba region nung rail network tejentiba aser tulutiba ya Egypt nung lir aser iba ama asüama lendong ya mapang shia ajurur.

2002 küm nisung tali mena aliba passenger train ka indang takdang tenet nung mi jangrua nisung 360 takum samaa liasü.

Myanmar sorkar atsüngdokba sülen asür nisung 300 jungogo

Naypyitaw, Metsüremi/March 26 (Agencies): Myanmar nung nisung 34 shi süogo aser mitkartemi sorkar atsüngdokba anema nokdaker dak sepaitemi azüdokshia tashiyim mapa inyakba nung civilian asür ajak agi 320 ajunger, ta iba linük nung nisung asüba aser apuba asadangba telok, Assistance Association for Political Prisoners (AAPP) ajanga Brehostibarnü metetdaksü.

Yimti tulutiba, Yangon aser arrtsülen ethnic minority aliba tesemtem nung densema Myanmar linük ajungalen nisung talila asüba jangjateta lir, ta AAPP ajanga ashi.

Linük nung yimti tulutiba jenjang tanabuba nung aliba, Mandalay nung arishi küm 16 tain ka dak tesülen nungi akhaba sülen asü aser ambulance tem nunga injang khaloktsü, ta iba tentet yagi ashi.

Asürtem ya iba dang nungi

kanga agi timba alitsü, ta AAPP ajanga ashir.

"Anogoshi nisung meimchir anema mapa tamajung inyaker," ta ashi, saka item tatalokba ya kuli tejangja mesayuteter.

Mitkartemi sorkar atsüngdokba ajanga anüolen linük kar kanga mepelai tenokdangba balala agütsür, aser item rongnung United States dena lir, aser hopta tetenzüklen arishi küm 7 tanur ka tepsetba sülen parnoki mitkar lenirtem Brehostibarnü aitsü.

"Tanurtem anema tesempatsü mapa inyakba, kabo arishi küm tenet liasü, shiba lar kidang tebu den mena lia khaset, ya ajanga Burma mitkar yimsüsürtemi külem nübur dak tashiyim amshiba aser Burma nung aliba nüburtem taküm mapayuba tali sayur," ta State Department indang odongtar Ned Price-i sangdong ka nung ashi.

Sepaitem inyakyim tematiba nung aitsüba mapang, "Yimsüsüri azüdokshia aser amokmerena yimsü masütsüla," ta Price-i ashi.

Mitkartemi tashiyim mamshi ta ashir aser national security nem timtem agütsüba iba amala tensa nungba parnoki inyakba mera ya tapet lir, ta ashir.

Longkak aiter 164 aser security forces züngsem teku takum samaogo, ta mitkar indang odongtar kati Mongulbarnü ashi.

AAPP indang data nung asürtem ya shilem 25 bo tekolak nung injang agi akhaba ajanga asü, ta sayur. Saka nisung asüba shia indang data ajungabo monguteter.

Asürtem ya shilem 90 jungnüa teburtem lir aser shilem asem shi arishi küm 24 mesüra tekübok alirtem lir.

Iba longkak aitba mapang tanur 20 tepsetogo, ta Save the Children ajanga ashir, kong tear

gas, rubber bullet aser injang tali amshiaka longkak aiter temolung ajemba mesayur.

Hokulbarnü National League for Democracy (NLD) indang headquarters nung mi adok. NLD ya Myanmar nung election ajanga shimtetba civilian lenir Aung San Suu Kyi indang party lir. Suu Kyi ya February 1 nü mitkartemi sorkar atsüngdokba mapang apuba tang tashi mechiyoki lir.

Yangon yimti nung aliba NLD headquarters nung Molotov cocktail ka Hokulbarnep mereplokja mi jangrudaksü, ta party ketdangsür kati ashi.

"Anasa alirtemi mi jangrua aliba meteta mi remseptsü atema fire service department nem osang agütsü... Anepdang 5:00 ako (par mapang) meta mi ya remsepteter liasü," ta NLD züngsem aser iba headquarter indang ketdangsür Soe Win-i osangbener dang ashi.

"Nisung kari Molotov cocktail nung mi senloksür headquarters nungya mereploktsü amai ajiteter."

March 27 nü Myanmar nung Armed Forces Day amungtsü lia iba lendong ya atalok. Iba anogo mitkartemi par tashu sayua yimti yimtung nung jajar.

Kasa mapang Washington nung U.S. Treasury Department ajanga Myanmar Economic Holdings Public Company Limited aser Myanmar Economic Corporation Limited dak tenük yoker tenokdangba tasen agütsüba sangdongogo.

Company anaprong ya mitkartemi amokbanga aliba network lir, aser iba company kübok ali rongsen bushiba nungi tourism tashi lir.

United States ajanga tenokdangba agütsüba den mesüktepa Britain-ia Myanma Economic Holdings Ltd nem tenokdangba agütsütsü, ta shiogo.

AR-i Drawing aser Painting competition ayongzük

Kohima, Metsüremi/March 26, 2021 (TYO): HQ IGAR (North) kübok Assam Rifles indang Kohima Battalion-i Hokolbarnü Kohima Garrison, Old Ministers' Hill aser Kezo Town, Kohima District, Nagaland nung tanurtem atema Drawing & Painting Competition ka ayongzük. Iba sentong ya "EK BHARAT SHRESHTHA BHARAT" omen nung ajemdaker ayonga agiogo.

Assam Rifles-i ayongba sentong nung tanurtemi jangrabangra shilem agiogo

aser agüja aliba omen nung parnoki (tanurtem) tasa balala amshia shilem agia liasü.

Iba ama sentong tajung ayongzüksüba asoshi school temi Assam Rifles dang pelaba metetdaksü. Assam Rifles-i ayongba Drawing aser Painting competition nung, Kohima Garrison nungi tanur 59, Cimorb Public School nungi kaketshir 22 aser Ministers' Hill Baptist Higher Secondary School nungi kaketshir 431 agi shilem agiogo.

Kasa anogo, HQ IGAR (North) kübok Assam Rifles indang Chieswema Battalion-ia

"EK BHARAT SHRESTHA BHARAT" omen nung ajemdaker ARPS, Chieswema, Kohima nung 'Run for Fun' drive sentong ayongzüksü. Iba den külemi Chieswema Battalion-i Display Board Making Competition ayonga agiogo.

Iba sentong nung ARPS, Chieswema nungi tsürabur 15 aser kaketshir 30 agi shilem agiogo. Assam Rifles-i iba ama sentong tajung ketdangsüa achaayangba atema tsürabur aser kaketshir temi pelaba metetdaksüogo.

India nung Vivo X60 series April 2 nungi ayoktsü

New Delhi, Metsüremi/ March 26, 2021 (Agencies): China indang smartphone yangluba company - Vivo-i India nung flagship series - Vivo X60 series sayaogo. Iba X60 series nung Qualcomm Snapdragon processors aser ZEISS camera lens den Gimbal stabilisation. Vivo X60 series nung Vivo X60, Vivo X60 Pro aser Vivo X60 Pro+ dena lir.

Vivo X60 aser Vivo X60 Pro nung Qualcomm Snapdragon 870 chipset aser Vivo X60 Pro+ nung Qualcomm Snapdragon 888 SoC ajanga tashi agütsür. Vivo X60 - 8GB RAM + 128GB storage variant jenjang sen 37,990 aser 12GB RAM + 256GB storage variant jenjang sen 41,990 asütsü.

Vivo X60 Pro - 12GB RAM + 256GB storage variant jenjang sen 49,990 aser Vivo X60 Pro+ 12GB RAM den 256GB storage variant jenjang sen 69,990 alitsü.

Iba smartphone series jelia mekaa ayutsü atema lapoktsüogo aser April 02, 2021 nü nungi tenzüka ayoktsü. Smartphone series ajunga Flipkart, Amazon, Vivo.com, Tata Cliq aser Paytm Mall den offline partner talisa Reliance Digital, Croma, Vijay Sales aser tanga retail outlet tem ajanga angutsü.

***Vivo X60 Pro+ Specifications**
Vivo X60 nung 6.5-inch Flexible AMOLED display den

120Hz refresh rate aser 240Hz touch sampling rate den 398ppi pixel density aser Schott Xensation Up screen protection inoka yanglutsüogo. Vivo X60 Pro+ maparen Qualcomm Snapdragon 888 SoC den 12GB LPDDR5 RAM aser 256GB UFS 3.1 storage ajanga achaayangtsür, saka memory ya expandable masü. Iba smartphone nung 4,200mAh battery den 55W FlashCharge fast charging technology aser Android 11-based FunTouch OS 11.1 dena lir. Camera atema, Vivo X60 Pro+ tesülen quad camera setup angutsü, kong 50-megapixel GN1 sensor den optical image stabilisation, 48-megapixel Sony IMX 598 sensor den Gimbal Stabilisation, 32-megapixel shooter aser 8-megapixel camera dena lir. Iba phone tejaklen 32-megapixel selfie snapper ka angutsü.

Connectivity atema, Vivo X60 Pro+ nung 5G, dual-band Wi-Fi, GPS, NFC, Bluetooth 5.2 aser USB type-C port inokja lir.

Vivo X60 Pro nunga kasa 6.5-inch Flexible AMOLED display den 120Hz refresh rate aser 240Hz touch sampling rate den 398ppi pixel density aser Schott Xensation Up screen protection angutsü. Iba phone nung Qualcomm Snapdragon 870 chpiset den 12GB RAM aser 256GB internal storage angutsü. Vivo X60 Pro nung 4,200mAh battery den 33W

FlashCharge fast charging dena lir. Camera atema, iba smartphone tesülen triple camera setup angutsü, kong 48-megapixel Sony IMX598 sensor deb Gimbal stabilisation aser 13-megapixel camera ana inoktsüogo.

Tejaklen, Vivo X60 Pro nung 32-megapixel selfie snapper angutsü. Connectivity tsütsü reprangdangra, iba smartphone nung Vivo X60 Pro+ ama alitsü, saka Vivo X60 Pro nungbo NFC dena mali aser Bluetooth 5.2 melen Bluetooth 5.1 ang angutsü.

*** Vivo X60 Specifications**
Vivo X60 ya Vivo X60 Pro ama shilem timbaka kasa angutsü. Iba smartphone nunga 6.5-inch Flexible AMOLED display den 120Hz refresh rate aser 240Hz touch sampling rate den 398ppi pixel density aser Schott Xensation Up screen protection dena lir. Qualcomm Snapdragon 870 SoC den 12GB RAM aser 256GB UFS 3.1 storage ajanga iba phone maparen achaayangtsür. Iba phone battery tasazük 4,200mAh alitsü aser 33W fast charging angutsü.

Vivo X60 nunga triple camera setup angutsü, saka iba camera nung gimbal stabilisation medeni 48-megapixel Sony IMX598 sensor den 13-megapixel shooter ana angutsü. Phone tejaklen, 32-megapixel shooter inoktsüogo.

Kohima jila nung tzü tajungba... (Tapak 1 nungi...)

"Southern Angami Public Organisation (SAPO) nung Zaru tzü agütsüba kiburtem aser Mima o Kezoma nung alirtemi Kohima nung alir nem tzü agütsütsü molungba atema kanga pelar. Sorkar tenüng nung nenok ajak dang pelaba metetdaksür" ta Rio-isa ashi.

"Kohima atema tzü tajung bener arutsübaji Dzukou water project tajungtiba lir saka iba mapatong ya küm 15 tashi süia arur. Iba mapatong atema ali ken o angatettepogo aser department-i DPR renemdar. Sorkari telok balala nungi sen aputsü atema lenmang bushidar" ta paisa ashi.

Nagaland nung ali ya nübortem meyong lir anungji

nübortemi sorkar den yaritepa terenlok mapa inyaktsüla. Asenok Mizoram nung ama sorkar aser nübortem tsüngda tesentaktep tajung yur terenlok bener arutsüla, ta Rio-isa metetdaksü.

"Naga nungeri service balala agiba atema sen agütsütsü yimya sübatsüla. State sorkari power sector nung takoksa jenti angur kechiyong sorkar mapa inyakertem dena consumers-i sen magütsür" ta paisa ashi.

Nagaland kübok jilatem nung water aser power sectors privatize asütsüla. Ibaji asü nungdang prepaid metering system shitak tenzüktettsü aser sorkaria revenue angutsü, ta

CM Rio-isa ashi.

Iba sentong nung PHED minister Jacob Zhimomi-ia o jembidang water supply scheme tajungba akümba ajanga Kohima jila nung alirtem anisüngzük angutsü ta ashi.

Iba sentong nung Minister, Advisor aser PHE department nungi dena ketdangsür aikati CM Neiphiu Rio meina liasü.

Sentong nungsa Mima Village Council Chairman Neichiizo Keyie aser Kezoma Village Council Chairman Puhovi Tase nati o tatsütsü jembi aser idangji department aser state sorkar den yariteptsü nangzük. Tatem nung Secretary PHED Nagaland Kesonyü Yhome-i anküp tepela o jembi.

MULUNG NEN O

ASO :
10-09-1961



ASÜ :
21-03-2021

Ajungben yipru aru ama, iba alima nungi onoki teti meima aliba Asür **Tiapokla Jamir** (Chuchuyimlang) alima wadang tembanger Tebu Tsüngrem dangi aoba mapang nungi lepkomung anogo tashi Arogo, lokti tentet balala den kija kibong shirnokisa nübu, rongsen, sarasadem aser shisatsü agi ozü den yaritepogo, nenok ajak dang tepang agi meshitetba tepela lemsateper.

Nenok mapa tajung asoshi Tulusang Tsüngremi maneni moajang ta ozüi sarasademsür.

Temeim jabaso, jala aser kinungertem.

India nung 'BMW M 1000 RR' saya



Mumbai, Metsüremi/March 26, 2021 (Agencies): BMW Motorrad-i India nung 'M 1000 RR' superbike sayaogo. Iba motorcycle standard variant jenjang sen lakh 42 (ex-showroom) aser Competition variant jenjang sen lakh 45 (ex-showroom) alitsü.

March 19, 2021 nü Twitter sabang nung company-i teaser video ka lemsatepa liasü aser iba video den külemi "Are you ready to hear the rumble? BMW M 1000 RR yakta tonga arutsü," ta olen ka lemsatep.

Iba superbike ta S 1000 RR indang variant ka lir aser company-i ashiba agi, taoba model dang nungi model tasenba ya tepungbaba aser takaraba lir.

BMW motorcycle nung M temaitsü ajenoktsüba ya mezüng alitsü, koba BMW gari atema dang iba temaitsü amshia aru aser September 2020 nung iba mapatong ya company indang motorcycle tasenba nung tenzüksüogo.

Design tsütsü reprangdangra, M 1000 RR ya S 1000 RR indang chassis nung amenoka yanglu. Iba bike nung braking performance tajungba alitsü. Iba motorcycle performance karadaktsütsü atema, company-i Mahle nungi two-ring forged pistons, Pankl nungi titanium connecting rods tepungba aser intake ports den duct geometry tasen inoka yanglutsüogo.

BMW M 1000 RR nung water/oil cooled 4-cylinder in-line engine - 999 cc displacement angutsü. Engine tasenba ya BMW S 1000 RR engine nung amendaker yangluba model ka lir, koba high-performance racing engine ka ama amshitsü atema tajungba yanglushitsüogo.

Iba motorcycle engine ajanga 14,500 rpm nung 212 hp

(156 kW) aser 11000 rpm nung 113 Nm torque agütsür. M RR yagi second 3.1 nung 0-100 kilometer tashi aoer aser motorcycle top speed ji 306 km/h alitsü.

Power timba agütsütsü asoshi, motorcycle indang intake port ajunga yanglushiogo, koba super-sport aser track atema superbike tetemjen ka ama amshiteter.

BMW ShiftCam Technology ajanga BMW M 1000 RR nung torque maparen junga achaayangtsür, koba low aser middle speed tsütsü nungitter. Iba variable camshaft control BMW ShiftCam ya khenyongi dang technology tasen lir. Ibaji ajanga engine tashi ulutsüba den, emission aser totzü tali ajemba ajemtsür; aser engine inyakyim tali anüka kümtsür.


Track motorcycle ka ama, BMW M 1000 RR nung riding mode pungo - Rain, Road, Dynamic, Race aser Race Pro angutsü. Tanga feature tsütsü reprangdangra, iba motorcycle electronics package nung launch control dena lir; iba den külemi tetsüng anaprongla nung disc brakes den dual-channel ABS aser M carbon rim angutsü.

Kasa motorcycle ya optional M Competition package nung angutsü, kong chassis takangba, swingarm talang, carbon-fibre winglet, windscreen talang aser tanga aika densema lir.

BMW M 1000 RR nung Multifunctional instrument panel - TFT display ya inch 6.5? alitsü. Iba Pure Ride screen display mesüra Core Ride screen nung motorcycle dak sendakba tongtubang osangtem metetdaksür.

Ano külen, BMW Motorrad multi-controller ajanga connectivity function achaayangtsür. App medeni phone ajanga media function tem amshitettsü.

36buba PDSA meet tanü tembangtsü



Kohima, Metsüremi/March 26, 2021 (TYO): Thenyizu yimdak Phek District Sports Association (PDSA) indang 36buba meet tenzüker külen nungi Hokolbarnü pezünübuba jungogo.

Iba anogo tebur football mezüing semi-final asaya nung Secheke Range Sports Association (SRSA)-i goal 3-1 agi Chokri Area Games & Sports Association (CAGSA) koka final-i iogo.

Tanabuba semi-final nung Centre Chakhesang Sports Association (CCSA)-i Chozuba Area Sports Association (CASA) madak goal 3-2 agi

kokogo.

Honibar (27.03.2021) anepdang 10:00 ako meta SRSA aser CCSA na final asayatsü.

Tetsür volleyball final nung Tizu Area Sports Association (TASA)-i CAGSA madak takok nguogo.

Tetsür Football final nung CCSA-i goal 1-0 agi Phek Area Sports Association (PASA) akokba sülen tetsür football champion title benogo.

Tetsür basketball final nung CAGSA-i takok angu aser SRSA puri runner-up jenjang ajangzüktet.

Kasa asayamung, tebur basketball final nung, Khezha-

Kuzha Tephe Sports Association (KKTSA)-i 27-22 agi SRSA tsükdaktsüba sülen title kokogo.

Tebur Volleyball final nung CASA-i CAGSA tsükdaktsü.

Maneni, Honibarnü tebur Football final masayadang, anepdang 9:00 ako meta PDSA ketdangsurtem aser area president tsüingda exhibition match ka ayonga asayatsü.

Iba meet shibangba sentong nung PDSA general secretary Solomon Ritse menden alitsü. Kasa sentong nung PDSA vice president Verhayi Swuro-i tepela anküp o jembitsü, ta sangdong ka ajanga metetdaktsü.

MDFA ajanga metetdaktsür

Dimapur, Metsüremi/March 26, 2021 (TYO): Football Referee exam atema tejangrar candidate tem MDFA-i jaoker. Iba tatidang (exam) ya April 03, 2021 anepdang 8:00 ako nungi tenzüka Imkongmeren Sports complex nung agitsü. Applicant

tem tenüing agütsütsü atema April 02, 2021 anogo tatem alitsü. Iba exam dak sendakba nung osang tejangria metettsü atema ph no. 9612581557, 9856890504 nung tongtepratepang, ta MDFA-i metetdaktsü.

Kohli-i alizüing tasen ka tongtet

Pune, Metsüremi/March 26, 2021 (Agencies): Hokolbarnü, Maharashtra Cricket Association Stadium nung India aser England na tsüingda tanabuba ODI asaya nung captain Virat Kohli-i One Day International run 10,000 alizüing tongtetogo.

Batting tarenzen nung no.3 batsman ama Kohli-i run 10,000 alizüing tongtetba ya batsman rongnung pa asayar tanabuba alitsü. Taoba mapang Australia captain Ricky Ponting-i iba alizüing mezüing tongteta lir.

ODIs nung no.3 batsman ama asayar rongnung Ponting temaba jenjang nung alitsü; innings 330 nung pai run 12,662 yanglua lir. Ano külen, India captain Virat Kohli-i ODIs innings 190 nung run 10,000 ajangtetogo.

Ponting aser Kholi sülen, list

nung batsman tasembuba ji, taoba mapang Sri Lanka nung batsman mongin Kumar Sangakkara alitsü. Sangakkara-i innings 238 nung run 9,747 yanglua lir aser pa sülen South Africa nung Jacques Kallis (7,774) alitsü.

India aser England na tanabuba ODIs asaya nung, India nung opener Shikhar Dhawan aser Rohit Sharma nati run aika meyangluteti out asüba sülen, Kohli aser KL Rahul na partnership ajungba ajanga India innings nung asentenshi tulu adokdaktsü.

Over 26 sülen, India indang score 121/2 den Kohli aser Rahul na run 47 aser 42 nung asaya liasü.

ODI series asem nungi mezüing asaya nung India-i run 66 agi takok anguba sülen, 1-0 agi parnok tejakdang kümogo.

Shooting World Cup: 50m Rifle 3 Positions Mixed Team nung Sanjeev Rajput o Tejaswini Sawant nati gold angu

New Delhi, Metsüremi/March 26, 2021 (Agencies): Hokolbarnü, ISSF World Cup - 50m rifle 3 positions mixed team asayamung nung India nung Sanjeev Rajput aser Tejaswini Sawant nati gold medal takok nguogo.

Dr Karni Singh Shooting Range nung ayonga asayaba gold medal round nung India nung temeyoktep tarep yagi Ukraine nung Serhiy Kulish aser Anna Ilina madak 31-29 agi takok angu. Tesüiba küm ishika tejakdang tenati asayamung balala nung ajangshia aruba tasatem amshia asayaogo. ISSF World Cup asayamung nung Sanjeev aser Sawant nati India atema gold medal 11buba bendelokja liasü.

Bronze medal round nung Aishwary Pratap Singh Tomar aser Sunidhi Chauhan nati 31-15 agi USA nung Timothy Sherry aser Virginia Thrasher tsükdakja bronze medal takok nguogo.

Gold medal takok angur Rajput aser Sawant na 5-3 agi tejakdang makümdang, tena 1-3 agi Ukraine team tesülen liasü. Ajisüaka, India team-i ano point aika atonga mangudang tesemdanger team-i tena ajateta asaya aser iba nung jagi Rajput aser Sawant nati maongka

magütsüi asaya aser India atema medal angu.

Ukraine team-i India team menepa asayatsü tasa balala amshia asaya, saka tenati point ana agi India team makok.

Tanabuba Qualification asaya nung, Rajput aser Sawant nati point 294 shi ngua tena sentepa point 588 tashi ngutet.

Ano külen, final qualification asaya nung jenjang pezübuba aser Bronze medal round tongtettsü atema, Tomar aser Chauhan na sentepa point 580 ngua liasü.

America nung Thrasher aser Sherry (581) na tejakdang Kulish o Ilina nati point 583 ngua jenjang tasembuba tongtet.

Kasa asayamung, tebur 50m rifle 3 positions team final tetoktepba nung India nung Niraj Kumar, Swapnil Kusale aser Chain Singh nung USA team madak ayong ayonga takok anguba sülen, India team atema gold medal 12buba bendenloktsü.

Dr Karni Singh Shooting Range nung Kumar, Kusale aser Singh nung USA nung tebur team - Nickolaus Mowrer, Timothy Sherry aser Patrick Sunderman tsükdakja gold medal 12 buba takok angu.

Iba asaya mezüing series nung India team-i 10.1, 10.5 aser

9.5 angu. Kasa mapang America team-i 9.9, 9.8 aser 9.5 dang tongtet.

Tanüingba series asem nung tesemdanger team (USA)-i temelenshi kar sayua asaya, saka India team-i parnok nem ajatettsü maongka magütsü aser tejakdang ser asaya.

India team-i asaya shia nung point 10s dak team aser iba point tera agi metungjemi asayaba mapang, USA team nungi shooter tem 10s khien danga metongteti 9 aser 8 ang tongteta asaya.

Brehostibarnü, India team ya Hungary den final asayatsü renemer liasü, saka world no 1 shooter Istvan Peni aser asayar tejen Peter Sidi na tsüingda mangatetep adokba ajanga iba asaya nungi tena tukadok. Istvan-i bipod ka amshiba dak sendakba nung asaya ana tsüingda mangatetep adoka liasü.

Bodhbarnü, qualification asaya nung, India team-i aggregate score 875 ngua temaba jenjang ajangzüktet.

Hungary team nungi Peni, Pekler aser Sidi nung USA tanabuba aser America nung Nickolaus Mowrer, Timothy Sherry aser Patrick Sunderman nung USA jenjang tongtet.

25m rapid fire final nung Vijayveer Sidhu-i silver angu



New Delhi, Metsüremi/March 26, 2021 (Agencies): Hokolbarnü, ISSF World Cup - tebur 25m rapid fire pistol final tetoktepba nung India nung Vijayveer Sidhu-i silver medal takok nguogo.

Sidhu-i Estonia nung Peeter Olesk makokba ajanga iba tetoktepba nung pai silver ang ngutet.

Iba asaya nung shooter anaprongla shot 26 ngua top spot atema 40-shot final nung tenaprongla tie süadok. Shoot-off mapang, tibuba aser final series nung shot pungo nungi shot pezü asayaba sülen, Vijayveer Sidhu-i ka dang ngutet.

Timtem kecha melii, final

nung Olesk-i kanga meranga asayaba sülen, gold medal ngutettsü atema pai shot pezü ajangzüktet.

Kasa tetoktepba nung, külem India nung Anish Bhanwala aser Gurpreet Singh nati jenjang pungobuba aser trokbuba tongtet; aser Poland nung Oskar Miliwek-i point 20 ngua bronze medal takok angu.

Qualification 2 asaya nung, season shooter Gurpreet-i final nung point 581 ngua jenjang tasembuba tongtet. Mezüing aser tanabuba round asaya nung, pai shot 290 aser 291 ngua liasü.

Külem India nung Anish indang score ajak sentepa 579 tongtet aser Sidhu-ia jenjang trokbuba den final qualifying stage ana nung aggregate 579 anguba sülen, final tetoktepba nung asayatsü maongka angu.

Maneni, final qualifying nung Peru nung Marko Carrillo-i point 582 ngua temaba jenjang tongtet aser pa sülen jenjang tasembuba nung Estonia nung Peeter Olesk liasü. Kasa mapang, Miliwek jenjang pezübuba nung tembang.

BILEMDANGANG

"Shisa akaribo yimjiyimjung sülen timtem arutsü kümümshia alir."